

Jemsdi Judahi metamdok pepa youyemguk Yodakale Mede

Jemsdi pepa youkukneŋ inoŋ adi mede momohi fee Bepaŋ'walaŋ metam kwetkwet hatiŋdi titiŋ momohi u yehikaliŋa titiŋdok wendiniŋ yodakaleeŋ youkuk. Jems adi metam fee yehitubulodaune ne mede yoguk u nadinadihik gineŋ nadidakale tineŋ yoŋa yoyout gineŋ mede fee youkuk.

Tiŋa Jems adi mede fafaŋeŋ niŋ indiŋ yoguk: Me Jesu nadisukilitimineeŋ adi yadi hogok mu hatiyaneeŋ. Mokoŋ. Adi yadi me nolidok titiŋ momohi tiyemaneeŋ. Kaŋ titiŋhik wendi nadisukilitihik fafaŋeniŋ hayemilak wondiniŋ mebi yobihituwaak.

Youtumba mede

¹ Nu Jems, Bepaŋ eŋ Wapum Jesu Kilisto'walaŋ tipilapilaye kwanai-medi Judahi mebop 12 dane pupuheneeŋ kwetkwet mebop noli baŋamhik gineŋ hatitawiŋ, hidi haniutumbaŋ pepa i youhamulat.

Tikamanda diniŋ mede

² Notneye, hidi tikamanda mebimebi mintahambune kaŋ welemomoŋ hogok nadiyaneeŋ.

³ Nemek undiniŋ kuyeŋ nadisukilitihik mahamulune kokoidi fafaŋeune hidi fafaŋe hinek tineeŋ.

⁴ Fafaŋe diniŋ folooŋ hidi'walaŋkade minta hinek tibaak. Unduŋ tubune hidi nemek niŋdok lohilohi tiŋa welemulap mu tineeŋ, adi tobo nadisukiliti diniŋ hatihati gineŋ bedidapmaŋ tiŋa me hinek hatiyaneeŋ.

⁵ Eŋ niŋ indiŋ. Hidi'walaaniŋ niŋdi nadinadi fuliŋgoŋ lohina kaŋ Bepaŋ ninadiluwaak. Kaŋ Bepaŋ adi metam hogohogok nininto mu tiŋa nemenemek siloniŋgoŋ nimilakdi tubu-mintamimbaak.

⁶ Ninadi adi welelufom tiŋa moŋ. Wapum kwambumuŋgoŋ nadisukilitimiŋa ninadiluwaak. Eŋ neeŋ welelufom tiŋa ninadiluwaak adi'walaŋ nadinadi adi sububadi ime luhineŋ fedililikeneune dombuŋoloŋ lolak ala wabiune pupuheneeŋ liwe tilak undiniŋ.

⁷ Me niŋ undiniŋ adi yadi Wapum'walaaniŋ nemek niŋ moŋgolaat yoŋa mu nadiluwaak.

⁸ Me niŋ welelufom be woŋgaliŋ buŋagaliŋ tihatilakdi Bepaŋ'walaaniŋ nemek kedem nemu moŋgolaak.

⁹ Me niŋ Kilisto'walaŋ kayoŋbopneniŋ fofonŋit hatilak adi Bepaŋ'walaŋ namanda foloŋ loloŋnit tilak doktiŋa nadifo tuluwaak.

¹⁰ Eŋ me niŋ Kilisto'walaŋ kayoŋbopneniŋ bomboŋnit hatilak adi Bepaŋdi nadimimbu fofonŋit tilak doktiŋa nadifo tuluwaak. Biyagoŋ kuyoŋ, adi wowoŋgimiŋdi sigeneeŋ golopmaiŋ dabugoŋ pilap kumumbaak.

¹¹ Mele adi haniŋ labuŋa kudutŋiŋdi kilihikit dalak kaŋ sigeneeŋ wowoŋgimiŋiŋ golopmaune tinahukutŋiŋ momooŋ u dapmalak. Undugoŋ hinek metam bomboŋ duhuduhuhinit adi

kwanai tomboyoula tihatineŋ inŋon on, kumun tineŋ.

¹² Me niŋ adi tikamanda mintamimbuune kakiyondaŋ kelekuŋfali hatibaak aditok adi Bepaŋdi nadiune utumba hinek tilak. Biyaŋon kuyon, adi yadi fafaŋe taulu ulu Wapumdi hatihati fafaŋeniŋ diniŋ mapme kulun mokomimbaak. Woŋ adi metam Bepaŋ welehikdi kahileiŋ aditok gigit yoŋit.

Tikamanda adi Bepaŋ'walaŋkade mu bulak

¹³ Kadakanin diniŋ tikamanda uyadi Bepaŋ'walaaniŋ mu mintalak. Unduŋ doktiŋa me niŋ kadakanin dok tikamanda mintamimbune indin mu yoluwaak, “Bepaŋdi tikamanda tinamulak.” Nebek niŋdi Bepaŋ kadakanin titin dok tikamanda tuwot mu timimbek. Be Bepaŋdi me niŋ kadakanin titin dok tikamanda mu timilak.

¹⁴ Tikamanda adi talik indin folon mintalak. Timentimeŋ adi me niŋ ne'walaŋ silodadi kadakanin titin dok nadigalikalak, kaŋ wondigon gebineŋ hamanelak.

¹⁵ Kaŋ silodadi mihiwele tiŋa biyelak adi wou “kadakanin”. Kaŋ kadakanin di bediŋa kitaan kumuŋ tubumintalak.

¹⁶ Notneye momohi, hidi mede i mu nadifika-neŋ.

¹⁷ Nemenemek momohi be silon fofohi monŋokam hogohogok woŋ adi kunumnehi biin. Betnik, Hauta Molom, adi'walaaniŋ foin. Biyaŋon kuyon, adi yadi undubo tiŋ undubo tiŋ mu tilak, be adi'walaŋ titin adi mele gineŋ yatnene

woliniņnikdi kweheyebo tiņ eņ muniņgoņbo tiņ tilak undiniņ moon.

¹⁸ Bepaņ adi biyagoņ nadikwambunda hinek tuguk doktiņa medeņiņ folooņ hinekdi waabiņiņ-mihiņiye nihitubu-mintaguk. Uyadi metam indi nemenemek hogohogok tubumintaguk wondiniņ folooņ, kwanai kobulineņ nanane folooņ koomkoom mintalak unduņ nabugoņ tineem nadiņa unduņ tuguk.

Mede nadinadi hogokdi folooņ mu tilak

¹⁹ Notneye momohi, i nadineņ. Metamdi mede nadinadidok lodayaneņ, eņ mede yoyodok be kwihita titiņdok adi malabuda tiyaneņ.

²⁰ Kwihita foloņ nemek tiņ wondi Bepaņ'walaņ titiņ didimeniņ diniņ talik fai tilak.

²¹ Unduņ doktiņa hidi welehiķ gengeņnit eņ koņgolondaņoņ u wabidapmaņ, kulemaņoņ hatiņila welehiķdi Bepaņ'walaņ medeņiņ welehiķ gineņ yetiguk u not timiyaneņ. Biyagoņ kuyoņ, wondigoņ welehiķ tutumbadok saņiniņ halimilak.

²² Hidi yadi Bepaņ'walaņ mede diniņ folooņ tubumintaneņ. Mede magihikdi hogok mu nadiyaneņ. Unduņ tineņ adi welehiķ talamut tineņ.

²³ Nebek niņ adi Bepaņ'walaņ mede hogok nadifit tiņa folooņ mu kelenj tilak adi yadi indiniņ: Me niņdi namanda hanom foloņ kaņ

²⁴ wooņ pilap hinek namanda dediniņoņ kalak u agaņ kaule tilak, undiniņ.

²⁵ Ingoņ nebek niņ adi Jesu'walaņ Mede Mo-mooņ baigoņ hinek kadidimeeņ nadihinakaan

mede u kaule mu tiŋa momooŋgoŋ hinek takalihinakaune Bepaŋdi me u kahaŋ timiluwaak. Mede Momooŋ uyadi Bepaŋ'walaŋ yodoko mede folooŋ hinek, wendigooŋ kadakaniiŋ gineniiŋ ninigitak.

Bepaŋ'walaŋ mede nadiŋa takaliŋa titiiŋdok

²⁶ Me niŋ adi netok “Nu Bepaŋ'walaŋ Mede Momooŋ hinek nadiŋa kamehatilat,” undooŋ yolakdi maŋiiŋ kedemgoŋ mu kadokolak, adi yadi weleniŋ talamut tilak. Me niŋ undiniŋ'walaŋ kayooŋbop hatihati u folooŋnit mokit tilak.

²⁷ Wapmihi kondiiŋahi eŋ tam kahat adi bulaniŋgoŋ hatibune yabu-ulidoko tiyemdok, be kwetfolooŋ kadakaniiŋ hatak wondi welenik tubuguyewaakneŋ doktiŋa didimeniiŋgoŋ hatidok, wondi biyagoŋ Betnik Bepaŋ adi'walaŋ hebeniŋ folooŋ hatihati gengeŋnit mokit tilak.

2

Me lolooŋnit be fofooŋnit titiiŋ kubugooŋ tiyemdok

¹ Notneye, hidi Wapumnik holiholiiŋeniŋ, Jesu Kilisto nadisukilitimiinŋdi me niŋ lolooŋnitdok titiiŋ niŋ be fofooŋnitdok titiiŋ niŋ mu tiyemaneenŋ.

² Nu yadi indiiŋdok yolat. Bophik yotneŋ me niŋ fukut homogineenŋ tinahukut momooŋ tiŋa baak, kaŋ adi'walaŋ sigineŋ me niŋ dahidahiŋiiŋ bulagineŋ eŋ kadakaniiŋ dahiŋa labaak.

³ Kaŋ hidi me dahidahiŋiiŋ momooŋ kudikudiniŋ adi'walaŋkade dauhik diweenŋ indiiŋ nineenŋ. “Du buŋa pop folooŋ inooŋ it.” Undooŋ niŋa fiyewakanŋ aditok indiiŋ nineenŋ. “Du guŋandiŋ yalenŋ” be “Foooŋ bahiiŋ folooŋ uŋgoŋ it.”

⁴ Biyagon kuyon, hidi lekingonhik folon metam tinahukuthik doktiņa yehidanein uyadi wele-hik maanen nadinadi hogoli hinek kamehebiune hatak doktiņa nemek u tubufikiin.

⁵ Notneye momohi, mede i yobe nadiņeņ. Bepaņdi metam dedihi yehidaneen yabukahi-leguk? Biyagon hinek, kwetfolon fiyewakahi hatiin adi yadi nadisukilitihik duhuduhunit dok-tiņa Bepaņ'walaņ hatihati kobuli kahiledok yehi-daneguk. Eņ uyadi nediņeņ welehiķdi kahile hinek tiin aditok gigit kameyemguk.

⁶ Kaņ hidi yadi metam hambeep dauhik kahakaha yabune meka tiin. Biyagon kuyon, nediņeņ hehiņafoon kiyap'walaņ hanagila wiin? Uyadi bomboņhinitdi tihamiin.

⁷ Unduņ tihamuņa Bepaņ negut hatidok nadiņa Kilisto wou folon hehitomboyoukuk u yopekit tiin.

⁸ Datok nadilaņ unduņon nokedok nadiluwaan. Bepaņ'walaņ Yodoko Mede daņiniņ unduņ youliņit hatak. Mede u biyagon takaliņa tubune utumbawaak.

⁹ Eņ metam fukufukuņon tiyemineen adi yom tubumintaune Yodoko Mededi metam mede wobu tiin wondiniņ mebi miņon tubumintawaak.

¹⁰ Nebek niņ adi Yodoko Mede noli kadem yehiulihawaak iņon kubuņon niņ ulatifowaak adi yadi Yodoko Mede hogohogok ula moņgofolak tibaak.

¹¹ Maņgande, yohomalam hidi kikabi tiņa ke-fifle mu tidemeek yoguk adigoņ du me mu ulukumumbaaņ yoguk. Unduņ doktiņa du tamge

bikabuŋa keffile mu tibaan inŋon me niŋ binek

Yom bibiŋdok mede

¹²⁻¹³ Me niŋdi welekulema folon yom bibiŋ mu tiŋa hatibaak adi yadi hatigene kibibo welekulema mu timindok. Yomniŋ unŋon bimimbu halaak. Unduŋ doktiŋa Jesu'walaŋ Mede Momoonŋdi Yodoko Mede komi diniŋ folofolok gineniŋ nihifiyakulaak wondok nadinadiŋila mede yoyohik be titiŋhik didimeniŋonŋ tiŋa hatiya-neeŋ. Welekulemanit hatibaak adi yadi mebi yodapman nai folon munta mu tibaak.

Nadisukiliti foloonŋit u dedinŋ?

¹⁴ Unduŋ doktiŋa notneye, me niŋdi nadisukilitinit hatilat yobaak inŋon titiŋ kedem mu tibaak, me undiniŋ adi nadisukilitiŋiŋdi kedem mu tubulodawaak. Nadisukiliti undiniŋdi dedinŋ tiŋa kadakaan liwe tibe tulune tubulodawaak?

¹⁵ I nadiŋeŋ. Me be tam nohik niŋ adi haule be dahidahi eŋ nanane be nemek undihidok baniŋ tulune

¹⁶ hidi'walaaniŋ niŋdi me be tam u indinŋ nimbek, "Du kedem woŋ hatiluwaan, tiŋa sububa tibaaneŋ ala folooge mutdi mukokome tuluwaan eŋ nanane natoki tuluwaan." Nebek niŋ adi mede unduŋ hogok yoŋa silon mu tibaak kaŋ mede wondi noliŋiŋ u dedinŋ tiŋa tubulodawaak?

¹⁷ Unduŋ doktiŋa nadisukiliti hogok tiŋa titiŋ momoonŋ mu tibaak adi'walaŋ nadisukiliti u adi kumiŋ yodok.

¹⁸ Inŋon me niŋdi indinŋ binek yobek. "Me noliyeŋ nadisukiliti tiŋ, kaŋ me noliyeŋ titiŋ

momooᅇ tiin.” Nu mede wendok adi indin tubu-udanewit. Du nadisukiliti tilaᅇ iᅇgoᅇ titiᅇ momooᅇ mu binek tilaᅇ kaᅇ nu nadisukilitige diniᅇ folooᅇ u detiᅇa kadakalewit? Iᅇgoᅇ nu adi nadisukilitine diniᅇ folooᅇ u titiᅇ momooᅇ tibene wendi kedem ganindakalewek.

¹⁹ Du Bepaᅇ kubugoᅇ hatilak u agaᅇ nadikwambundaᅇa. U kedem hinek tilaᅇ. Iᅇgoᅇ oᅇ, mede u yabap hekidi maᅇ nadikwambundaᅇa hehele tiin.

²⁰ Me walage hambeep, du! Nadisukiliti kedem tiᅇa titiᅇ momooᅇ mu tilaᅇ doktiᅇa nadisukilitige u folooᅇnit mokit tilak.

Titiᅇ momooᅇdi nadisukiliti ulihilak

²¹ Unduᅇ tilaᅇ ale mebi i nadi! Dadanik Abalaham adi mihiᅇiᅇ Aisak Bepaᅇdok muni hemiᅇ tibene alta foloᅇ kameguk, nai uᅇaᅇiᅇ Bepaᅇdi nadimimbune yomᅇiᅇ dapmaguk. Uyadi Bepaᅇ’walaᅇ mede nadiᅇa titiᅇ kedem tuguk doktiᅇa unduᅇ tuguk.

²² Unduᅇ doktiᅇa agaᅇ be kalaᅇ. Abalaham’walaᅇ nadisukiliti u titiᅇiᅇiᅇ momooᅇ dut noᅇgoᅇ kwanainegumuk. Unduᅇ doktiᅇa titiᅇ momooᅇdi nadisukilitiᅇiᅇ u miᅇgilaᅇgoᅇ tubudakaleguk.

²³ Biyagoᅇ kuyoᅇ, unduᅇ degoᅇ tiᅇa Abalahamdok Youkudip Mede indin hatak u folooᅇnit tuguk. “Abalaham adi Bepaᅇ nadisukilitiune aditok nadimimbune me didimeniᅇ tuguk.” Unduᅇ doktiᅇa Bepaᅇdi me notne niᅇguk.

²⁴ Agaᅇ be kaiᅇ? Bepaᅇ adi me niᅇ nadisukilitiᅇiᅇdok hogok tiᅇa nadimimbune me didimeniᅇ

mu tilak. Foloonj hinek adi nadisukiliti tiŋa titiŋ maan momoonj tubune wondoktiŋa nadimimbune yomniŋ dapmalak.

²⁵ Eŋ tali tam Lehap* adi maan undugonj nadisukilitiŋiŋ diniŋ foloonj titiŋ momoonj tubune Bepaŋdi aditok nadiune yomniŋ dapmaguk. Adi yadi meyat Kanahan kwet kanadi tidene ugumukdi adi'walaŋ busuwagumuk kaŋ menot tiyemiŋa talik niŋ gineŋ yapmeune momonj ugumuk.

²⁶ Wondok indiŋ hatak. Foloonik gineŋ munabut mu halune adi kumiinj. Undugonj me niŋ nadisukilitiniŋdi titiŋ momoonj mu tilak adi'walaŋ nadisukiliti adi kumiinj.

3

Mebelemnik kadoko tiyaneem

¹ Notneye, hidi feedi metam yenindidime kwanai titiŋdok gicine mu tiyaneenj. Nadiin be? Kougonj hatigene Wapumdi mede yodapmanj tibaakneŋ metam yenindidime kwanai tiyam indi'walaŋ mede didimeniŋonj hinek kanadiŋa yomnikdok kibikonj mede malabumuŋonj ninimbaak.

² Indi wanaŋ hogohogok nemek fai tiŋa tubu-fit kisaŋ tiyam. Me niŋ adi mede niŋ yolak folonj kadakaninj mu tilak adi yadi me didimeniŋ niniŋdok. Me undiniŋdi kayonj kohonj be foloonj hogohogok kedem kadokolak.

* **2:25:** Josuwa Fiye 2 eŋ Fiye 6 Yowo 22 woonj 25, unjonj kunali nadidok.

³ Kale wosi heki adi mede tilolon tinimdok masingilingilim mahik ginenj boiyemam. Undunj tinj wendigonj kale wapuhi u yehitubudaneudane tiyam.

⁴ Enj muwage imengwanj folonj yawiinj hekidok maanj nadiyam. Adi yadi wapuhi hinek tinj adi yadi sububa wapum fedila siloneune wiinj. Ingonj onj, muwage kadoko hekidi kuyan kuyaninj-kabe muwage yehitubu-didimedok tumbainj wendi nehi dinandinj une nadiinjen ungonj didimeninjonj tubudidimeenj yawiinj.

⁵ Undugonj hinek me mebelem adi maanj nemek kuyaninj-kabe injonj sigitinjalokisanj tilak.

Mebelemniki fana tiyam

Kudup fininj adi nemek kuyaninj-kabe injonj onj, kudup-kabe undininjdi palagi kakanj heune dadapmalak.

⁶ Wendininj mebi indinj hatak. Mebelemniki adi kudup dabugonj dalak. Biyagonj kuyonj, wendigonj foloonik dikidiki noli yalakapmedapmaanj kadakaninj fulinjonj tinj metam titinjik be hatihatini kudup heune dadapmalak. Enj ne yadi ham gineninj kudupdi danenja dadapmalak.

⁷ Kale mebimebi, giinenji enj imenehi, enj bagi enj mingembet heki, nemek undihi adi metamdi kedem yanagila yehitubu-gatayam.

⁸ Ingonj onj, metam dininj mebelem adi me nediyenj fafanenj tubugatawaak? Adi yadi lakatanit mokit yakaleyakale tinjila yom tilak. Wonj adi mingembet muhabo dininj maninj ime upmunjit undininj.

⁹ Fukuniņ indin hatak. Mebelemnikdi Wapum Betnik niutumbayam, eņ mebelemnik wondigon metam Bepaņ ne'walaņ folonamandap medehaki yeniņa yehitubu-kadakayam.

¹⁰ Manik kubugon gineņ youtumba eņ medehaki labamuk. Notneye, wondiniņ mebi dedin aņ?

¹¹ Ime dawı kubugon gineniņ ime buukaan eņ momoon wanaņ kedem be labuņa wodiwek?

¹² Eņ notneye, bim foloņ kalip kedem be mintawek? Be gip foloņ bim kedem be mintawek? U tuwot moņ. Tiņa undugon, luhineņ felenı ime u nanaņdok tuwot moņ.

Nadinadisufulingon diniņ foloon tubumintadok

¹³ Hidi'walahi metam dedigonđi nadinadi fuliņnit eņ nemek u be u nadidakaleeņ tiinđi hatiin? Adi yadi nehitok nadiune foune titiņ kedem u tiņa nadinadi fuliņgonhik diniņ mebi miņgon tubumintayaneeņ.

¹⁴ Eņ welehek gineņ metam noli'walaņ nemek yabusiloda tikabeleeņ kwihitaaņ tosiwe tiņa sigitiņalo titiņ uņgon hayemulune mede foloon nadiyam yobune wendi biyagon mu tilak.

¹⁵ Titiņ undihi woņ adi kunumnehi mu yodok. Moņ. Titiņ undihi adi kwetfoloņniņ be me niņ'walaņ be Sadaņ'walaaniņ yodok.

¹⁶ Nemek yabusiloda be sigitiņalo titiņ u halune wendok foloņ tituwali kadakanı noli, danedane be malabumuņ noli noli fee mintaune kawetiņaņ.

¹⁷ Metam nediyeņ Bepaņ'walaniņ nadisufulingon moņgokiinı adi yadi titiņ indin tiin.

Timenɔ hinek adi welenik walaninɔ, aganɔ kulema, aganɔ nadikulema, aganɔ mede tilonɔ, aganɔ kulemanɔnɔ hatihati, enɔ Wapum'walanɔ kayonɔbop hatihati dininɔ titinɔ momohi noli. Enɔ noli fukufukunɔnɔ mu titindok, enɔ mede aganɔ biyagonɔ hogok yonɔ hatidok.

¹⁸ Metam kulema hahatdok gagine kwanai tiinɔ adi yadi kulema folonɔ youli momoonɔ diniyeti tubune foloonɔ hatihati didimeninɔ mintayemilak.

4

Datok nadiune fofonɔnit tuluwaak

¹ Hidi'walanɔ lekinɔnɔhik ginenɔ mik-kwadi enɔ tosiwe u manɔnɔnde mintalak? Biyagonɔ kuyonɔ, hidi yadi nemek titindok be monɔgotdok nadigalika tifit tiinɔ doktinɔ welehik ginenɔ mik mintalak.

² Hidi nemek hide'walanɔ monɔ u welehikdi yabukahileinɔ inɔnɔ dedinɔ tinɔ monɔgotnenɔ, moonɔ doktinɔ molohiye widihikumiinɔ. Hidi metam noli'walanɔ nemenemek doktinɔ kikakwihita enɔ tosiwene-fit tiinɔ inɔnɔ nemek u hidi monɔgotna hinanɔ mu tiinɔ. Wonɔ adi hide Bepanɔ mu ninadiinɔ doktinɔ undunɔ tiinɔ.

³ Ninɔ adi indinɔ: ninadi kwanai tiinɔ inɔnɔ onɔ, foloonɔ mu beinɔ. Uyadi welehik ginenɔ nadisu hogohi halune nadigalihakik hogok tubulodane nadinɔ ninadiinɔ doktinɔ foloonɔ mu beinɔ.

⁴ Ai, mede yofolok dobuwiyakiinɔ heki hidi! Hidi kudi u tiinɔ adi tam yohoinitdi yohoi bikabuɔnɔ woonɔ me noli dut kefile tilak undunɔ dabunɔnɔ tiinɔ. Abe nadinɔ? Me ninɔ adi kwetfolonɔ dininɔ nemek wondok nadigalika kisanɔ tibaak

adi yadi Bepañ mik timimbaak. Unduñ doktiña nebek niñ adi kwetfoloñ diniñ nemenemek kedem be kadakanin kaka moñgola hatibaak adi yadi Bepañ mik timimbaak.

⁵ Kañ Bepañ'walañ Youkudip Mede gineñ mede indin hatak u hidi nadiune foloñnit mokit be tilak? "Welenik gineñ munabuli kameguk uyadi Bepañ netok gigit hogok hatidok gicine hinek tilak."

⁶ Tiña undugoñ siloñ tobogoñ kisañ tinimilak. Unduñ doktiña Bepañ'walañ pepa mebinit gineñ mede indin hatak.

"Bepañ adi metam nehitok nadiune loloñnit tilak, adi'walañ kasop diliteleyemilak.

En nehitok nadiune fofonñit tilak, adi siloñ tobogoñ tiyemilak."

⁷ Unduñ doktiña hidi Bepañ gikingoñ timiña medeñin nadiyaneñ. Unduñ tiña Sadan moñ niheune bihabuñña momoñ uluwaak.

⁸ Hidi Bepañ'walañkade wooñ galiune adibo hidi habukahileluwaak. Kadakanin titin en welelufom tihatiin, hidi welehek youtela tubuwalandayaneñ.

⁹ Hidi hide'niñ mebihik nadiña kobulabulaye tineñ. Yogegeham tiin di wabiña bulaningon tineñ. En nadifohikdi dapmaune makat kobulabulaye mintawaak.

¹⁰ Wapum'walañ heben foloñ fofonñit hatibune adi hehitubu-pilalaak.

Kinintubukadaka mu titindok

¹¹ Notneye, hidi kinintubukadaka mu tiyaneen. Me niŋ adi noliŋiŋ niŋ niŋkadaka tiŋa nadimimbune tuwot mu tilak adi yadi Yodoko Mede niŋkadakaan nadiune founé uyakut tilak. Nebek niŋdi Yodoko Mede uyakutak adi mede tiloloŋ mu tilak. Adi tobo mede uut tiŋa Yodoko Mede u hogoli yolak.

¹² Bepaŋ, Yodoko Mede nimiŋa kadokolak, negoŋ metam yehitubu-lodaan yanagitak eŋ yehitubu-kadakalak. Kaŋ du yadi nediyendi ganindapmaguk doktiŋa me noke kibikoŋ mimiŋdok yodapmawen?

Wapumdi nadinimbune tuwot tubune nemek tiyaneem

¹³ Agaŋ ale, noli ibo nadien. Hidi indiŋ yohatiŋ. Kamiŋ be haloŋ yokwet uŋoŋ be uŋoŋ wooŋ muneen bombon kwanai tiŋa muneen bombon fee tubumintaan hatiyanene gulet niŋ dapmaune udaneen buneem.

¹⁴ Hidige! hidi haloŋ nemek unduŋ be unduŋ mintawek u maanbe nadiiŋ? Be hidi'walaŋ hati-hati u dediniŋoŋ? Uyadi mundidi labulabuŋila uŋaniŋoŋ liwelak undiniŋ.

¹⁵ Unduŋ doktiŋa hidi yadi indiŋ yobune tuwot tibek. Wapumdi nadinimbune tuwot tubune kaipmuŋ hatiŋila unduŋ be unduŋ tineem.

¹⁶ Ingoŋ oŋ, hidi yadi sigitiŋalo mede fee yoŋa hidetok nadiune lolonŋit tilak. Sigitiŋalo mede uyadi kadakanŋiŋ.

¹⁷ Me niŋ adi nemek kedem titiŋdok nadinadi u momooŋ hanadigene nemek nadisulak u mu tilak uyadi yom-ku tilak oŋ.

5

Metam muneen bombonhik nehitok yabukahile tiin aditok mede

¹ Nadiin be! Metam bombon duhuduhuhinit, hidi kougon nemek figitan mintahambaak wondoktina makat kobulabulaye indidegon tiyaneen.

² Bombonhik u kadakadapmaguk. Dahidahihik fee mumuyen u kalenginjin di nadapmagin.

³ En muneen bombonhik dahindahin tuguk, kan dahindahin wendi hide'walan mebihik mingon yobihilune foloohik kudupdi dadapmawaak. Uyadi nai wapum dapmandok nai dulalune muneen bombon hogok tiyout tift tigin.

⁴ Nadiin be? Pandin hide'walan kwanaihik ginen mongotnan bopnehamgin kan kwanaihik dinin tuwanin mu yemina kibida tigin, wondinin yomdi kudige wele tina Bepan'walan loguk. Tina kwanai-metam'walan kobulabulayededi kunumnenin Saninin Molom adi'walan magi ginen foguk.

⁵ Hidi kwetfolon duhuduhunit hatinila kale nanane koban koban hinar kisan bedigin. Undun tina nadifo tina mu nadituban hatilune fidihikumundok nai dulaguk.

⁶ Hidi metam didimehi medehik yodapmaan widihikumugin. Kan adibo fafanen sigihik yalimina hidut mindobu mu tigin.

Folofigita nai ginen fafane tina yayatdok

⁷ Notneye, hidi Wapum busuwadok woomina gweheye mu tineen. Indin nadinen: Kwanai

molom niñdi diniyeti tubudapmaan foloon mo-moon mintadok woomulak. Unduñ tiña gwi mele tuwolit tubune wapumgoñ eñ momoongoñ mintadok hati nadilak.

⁸ Undugoñ hinek Wapum'walañ nai agañ dula hinek tilak doktiña hidi undugoñ gwehegweheye mu tiña welehiñdi nadifafañe tiña woomhatiya-neeñ.

⁹ Notneye, hidi yolakata mu tiyaneñ. Nadiiñ be? Me mede yodapmañ tilak adi agañ talik yemeñ yatak. Adi kuyeñ hidi'walañ mebihik miñgoñ yobihilaakneñ ale hidi kikakwihita be kiyomunumunuñe mu tiyaneñ.

¹⁰ Notneye, i nadineñ. Polofet heki Wapum'walañ mede tiloloñ tiña adi'walañ mede yogiñ, adi yadi folofigita eñ bulaninggoñ helemahelemañ nadiña gweheye mu tigiñ. Indi mañ adi tigiñ undugoñ tiyaneem.

¹¹ Nadiiñ be? Folofigita nadiñila fafañe tiña hatigiñ aditok adi indin nadiyam: Bepañdi yehikahañneeñ yehitubu-lodaguk. Jopdi fafañeguk u agañ nadiyam, eñ mindañkade Wapumdi nemenemek kotigoñ kisañ tomboyoula miñguk u mañ agañ nadiyam. Biyagoñ hinek, Wapum adi welekulema eñ siloññiñ wapum halimilak.

Mede yofafañe diniñ mede

¹² Notneye, mede foloon niñ inak. Hidi kunum foloñ yotebitebi tiña yofafañe be kwet-foloñ yotebitebi tiña yofafañe be nemek niñ foloñ yotebitebi tiña yofafañe uyadi mu tiyaneñ. Hidi yadi medehik biyagoñ uyadi biyagoñ hinek yoyaneñ, eñ moñ kañ u mañ, moñ yoyaneñ.

Kohodidim wahin̄kade tiŋa yoyaugene yomnit tineeneŋ ala nadinadiŋila yoyaneen̄.

Yagit folofigita gineŋ hali indiŋ titiŋdok

¹³ Indiŋ titiŋdok, hidi'walaaniŋ niŋ adi folofigita be bulanin̄goŋ nadiŋa hatibaak adi yadi Bepaŋ ninadiluwaak. Eŋ nediyeŋ welemomoŋ nadiŋa hatibaak adi yadi nadifo tiŋa youtumba kap toluwaak.

¹⁴ Hidi'walaaniŋ niŋ adi yagit tiŋa hali kayon̄bop diniŋ talitimen̄ medenai kameyembune buŋa adut hali ninadi tiyaneen̄. Tiŋa Wapum'walaŋ wou yoŋa haguwo ime* folooŋ foloŋ hafiyemiyaneen̄.

¹⁵ Unduŋ tiŋa nadisukilitinit ninadiune Bepaŋdi me yagitnit u tubukedebawaak. Eŋ yom nenobu halimimbaak u maan̄ tumolokulimimbaak.

¹⁶ Unduŋ doktiŋa hidi kedeba titiŋdok nadiŋa yom yofiyat tiŋa ninadidi kikasop tiŋa tiyaneen̄. Me didimeniŋ niŋdi ninadi tubune saŋiniŋnit eŋ folooŋnit tibaak.

¹⁷ Ilaija adi me in̄goŋ, inde nabugoŋ. Ala adi gwi mu uutdok gicine tiŋa ninadiune gwi kwetfoloŋ mu ulaŋa halune gulet lufomkultiniŋ eŋ gulet niŋ diniŋ faki fukuniŋ dapmaguk.

¹⁸ Kaŋ mindaŋkade kotigoŋ ninadiune kunum gineniŋ gwi maune kwetfoloŋ nemenemek youli kotigoŋ fee kadoŋa labugiŋ.

Hatihatihik fiit tubune kotigoŋ yanagitdok

* **5:14:** Haguwo ime u bem wou olif wondiniŋ kilikidi tutum-bayagiŋ. Uyadi kukiŋ oel dabugoŋ.

¹⁹ Notneye, hidi'walaaniŋ niŋdi mede foloon diniŋ talik didimeniŋ u wabiŋa tubufit talik gineŋ uune noliŋiŋ niŋdi talik didimeniŋ nindidimeeŋ Bepaŋ'walaŋkade kotigoŋ nagila baak,

²⁰ adi yadi mede indiŋ hatak u momooŋgoŋ nadiwaak. Nebek niŋdi me tubufit talik keleeŋ kadakaniiŋ tilak u nintubudidimeeŋ talik didimeniŋ gineŋ nagilaak, adi yadi me u munabuliŋiŋ tubulodaune kumuŋ fafaŋeniŋ mu tibaak. Bepaŋ adi talik unduŋ foloŋ yom mohomohok tumolokutak.

**Bepaŋ'Walaŋ Folofolok Kobuli
Genesis, Exodus, Psalms, and the New Testament in
the Numanggang Language of Papua New Guinea
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

217908e9-ce08-5ac3-9947-124c48579a74